

Kalaallit Nunaannut nunatsinnilu angalanermi piumasqaatit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 6 a, 12 a, 12 b, 12 c, 21 a aamma 21 b aamma § 29 imm. 2 aamma 3 malillugit aalajangersarneqarpoq:

Atuuffia

§ 1. Nalunaarut Kalaallit Nunaata avataaniit angalasunut nunattalu iluani angalasunut atuutissaaq.

Atuuffiata killilerneqarnera

§ 2. Nalunaarummi matumani aalajangersakkat ilaat tamarmilluunniit inunnut inuaqatigiinnut pingaarutilimmik sulialinnut atuutsinnejassanngitsut aalajangerneqarsinnaavoq.

Imm. 2. Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

Imm. 3. Inunnut Issittumi Sakkutooqarfimmi tassanilu immikkoortortaqarfinni sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

Imm. 4. Inunnut Peqqinnissaqarfimmi sulisunut Nunatta Nakorsaneqarfia imm. 1 naapertorlugu aalajangiisassaaq.

Imm. 5. Inunnut imm. 2-4-mi taaneqanngitsuni sulisunut, Nunatta Nakorsaneqarfia imm. 1 naapertorlugu aalajangiisassaaq. Tamatuma saniatigut Nunatta Nakorsaneqarfia qinnuteqarnikkut inunnut inuaqatigiinnut pingaarutilimmik suliaqanngitsunut § 12-imit immikkut akuersissuteqarsinnaavoq.

Imm. 6. Nunatta Nakorsaneqarfiaita nalunaarummi matumani aalajangersakkat ilaat tamaasaluunniit peqqinnissaqarfimmi katsorsarneqartunut imaluunniit, pissutsit allat peqqinnissakkut sulianut immikkut illuinnartut atuutsillugit, inunnut ataasiakkaanut atuutsinnejassanngitsut aalajangersinnaavaa.

Imm. 7. Nalunaarut eqqartuussisut pissaanermik atortitsinerannut atuutinngilaq.

Timmisartumi Kalaallit Nunaannukartussami ilaasunut piumasqaatit

§ 3. Angalasut marlunniq sinnerlugilluunniit ukiullit piumasqaatini tulliuttuni ataaseq naammassippassuk aatsaat timmisartumi Kalaallit Nunaannukartussami ilaaqqusaapput:

1) Inuit Kalaallit Nunaanni najugaqartut imm. 2 naapertorlugu najugaqassutsimut aammalu Covid-19-

imik nappaateqannginnermut uppernarsaassapput.

2) Inuit Kalaallit Nunaanni najugaqanngitsut 18-inillu sinnerlugilluunniit ukiullit uppernarsarsinnaallugu tamakkiisumik Covid-19-imut akiuussuserneqarsimassapput aammalu Covid-19-imik nappaateqannginnermut uppernarsaassallutik. Akiuussutissat Europami nakorsaatnik nakkutilliisuniit, European Medicines Agency-mit (EMA-mit), akuerineqartut kisimi akuerineqarput.

3) Inuit Kalaallit Nunaanni najugaqanngitsut marlunni 17-inillu akornanni ukiullit Covid-19-imik nappaateqannginnermut uppernarsaassapput.

Imm. 2. Najugaqartut tassaapput inuit aalajangersimasumik nunatsinni najugaqartut, aalajangersimasumik najugaqalernissaq siunertaralugu maanga nuuttut kiisalu inuit maanni nunami piffissami sivisuumi suliartortut.

Imm. 3. Nunatsinnut angalasut inummut tunillatsissimasumut qanimut attaveqarsimanermi kingorna tunillatsinnissamut aarlerinartorsiorsimasutut najukkami oqartussanit ilisimatinneqartut Kalaallit Nunaannut aallanginnerminni timmisartumut ikitinnatik sapaatip akunnera ataaseq sioqquillugu Covid-19-imik nappaateqannginnermik uppernarsaatnik marlunni tulleriinnik takutitsissapput. Misissortinneq siulleq tunillatsissimasumut attaveqarnerup kingorna ullut sisamat qaangiunneranni pissaaq.

Misissortinnerup aappaa misissortinnerup siulliup kingorna ullut marluk qaangiunneranni pissaaq.

Imm. 4. Covid-19-imut misissortinneq PCR-imik misissuinerussaaq, matumani misissortittup aqqa, piffissaq misissortiffusoq misissuisorlu uppernarsaammi erseqqisumik allassimassallutik. Covid-19-imut misissortinneq napparsimmavimmi peqqissaavimmiluunniit assigisaanilu Nunat Avannarliit ilaanni suliarineqarsimassaaq Kalaallillu Nunaannut aallarnermi ullut marluk (akunnerit 48-t) sinnerlugit pisogaassuseqassanani.

Imm. 5. Covid-19-imut misissortinnermi piumasarineqartut Nunatta Nakorsaneqarfianiit aalajangersarneqartut naammassineqarsimassapput.

Imm. 6. Nunatta Nakorsaneqarfia imm. 1-4-imut tunngasuni immikkut akuersissuteqarsinnaatitaavoq.

Imm. 7. Imm. 1-ip maleruarneqarnissaata qulakkeernissaa angallassisumvik piginnittup akisussaaffigaa.

Timmisartut nunatsinnukartut paasissutissiisussaatitaanerat

§ 4. Angalasut Immersugassamik Sumut-mik immersuisimasut kisimik timmisartumut Kalaallit Nunaannukartussamut ilaaqqusaapput. Angalasoq Immersugassamik Sumut-mik immersuisimanermut nassiussisimanermullu uppernarsaammik timmisartumi sulisumut timmisartumut ikinnginnermini takutitsissaaq. Oqaaseqatigiinni siullermi appaanilu taaneqartup maleruarnissaa angallatip piginnittuata akisussaaffigaa.

Umiarsuarnut umiarsuarnilu ilaasunut Kalaallit Nunaannut tikittunut malittarisassat immikkut ittut

§ 5. Nunatsinnukartigatik ulluni kingullerni 14-ini nunani allani, Danmarkimi Savalimmiuniluunniit umiarsualivinni tulaqqasimappata, allatulluunniit iliornikkut sumiiffinnit taakkunangga ilaasunik ikiffigineqarsimappata, taava inuit nalunaarummi matumani §§ 8, 10 aamma 12 malillugit umiarsuarlutik Kalaallit Nunaanni umiarsualivimmut tulakkaangamik nunatsinnut tikittutut nalunaarummi matumani isigineqartarput. Inuit umiarsuarmut ilaasut umiarsuup Kalaallit Nunaanni tulaqqanerani nunameersunik 2 meterit ataallugit qanitsigalutik attaveqateqassagunik § 8 naapertorlugu qanermut imaluunniit kiinnamut

assiaquteqarnissaat piumasaqaataavoq.

Imm. 2. Umiarsuit nunatsinnukartigatik ulluni 14-ini kingullerni nunani allani, Danmarkimi, Savalimmiuniluunniit tulaqqasimannngippata allatulluunniit iliornikkut sumiiffinnit taakkunanit ilaasunik ikiffigineqarsimannngippata, taava inuit umiarsuarni ilaasut Covid-19-imik tunillanneqarsimannngitsutut naatsorsuutigineqassapput, inulli nappaammut ersiuteqarpat tamanna naatsorsuutigineqassanngilaq. Umiarsuaq ilaasullu nunat tamalaat akornanni angalaartut pillugit aalajangersakkanut ilaatinneqarput.

§ 6. Umiarsuit ilaasartaatit, taakkununnga ilanngullugit umiarsuit takornarianik angallassisutit, Danmarkimi Savalimmiuniluunniit tulaqqasimappata allatulluunniit iliornikkut ilaasunik ikiffigineqarsimappata nunatsinnukartigatik ulluni kingullerni 14-ini nunat allat umiarsualiviini tulaqqasimappata Nunatsinnut tulassinnanaangillat. Inerteqqut nunap immikkoortuanut tamarmut atuuppoq, matumanilu imartamut, taamaattoq nunat tamalaat akornanni pisussaaffit ataqqillugit. Oqaaseqatigiinni siullermi aappaanilu taaneqartup maleruarnissaa angallatip piginnittuata akisussaaffigaa.

Imm. 2. Imm. 1-imi aalajangersakkanik malinninnginnissaq pillugu Nunatta Nakorsaaneqarfia aalajangersaasinnaavoq.

Imm. 3. Imm. 1-imi inerteqqut apeqqutaatinnagu, imm. 2 naapertorlugu umiarsuarnut immikkut akuersissuteqanngitsunut inerteqqutaanngilaq:

- 1) Teknikkimat tunngatillugu tulanneq, matumani inuttanik ilaasunilluunniit nunamut niusoqarnani, imaluunniit inunnik avataaneersunik umiarsuarmut ikisoqarnani, kiisalu
- 2) umiarsuarmi ajornartoornermi, motorip ajutornerani, ikuallattoornermi assingusumilluunniit pinasuartumik pisoqarnerni tulakkasuarneq.

Imm. 4. Imm. 1 umiarsuarnut aalajangersimasumik aqquteqarlutik Nunatta umiarsualiviinut tulattartunut taakkunangalut avalattartunut atuutinngilaq.

Qanermut imaluunniit kiinnamut assiaquteqarnissamut piumasaqaat

§ 7. Angalasut aqqaneq-marlunniq sinnerlugillu ukiullit kiisalu timmisartuni saqisut qanermut imaluunniit kiinnamut assiaquteqassapput. Piumasaqaatip maleruarnissaa angallatip piginnittuata akisussaaffigaa.

Imm. 2. Imm. 1-imi piumasaqaat inunnut angallassisummi ineqqaniittunut assigisaaniiittunulluunniit aammalu ilaasunut illoqatigisamik saniatigut ilaasunik allanik attaveqarsimannngitsunut atuutsinngilaq.

Imm. 3. Inuit tamarmik aqqaneq-marlunniq sinnerlugillu ukiullit mittarfinniittut, aallariartortarfinniittut/tikittarfinniittut assigisaanniittullu qanermut imaluunniit kiinnamut assiaquteqassapput. Piumasaqaatip maleruarnissaa inuup akisussaaffigaa.

Imm. 4. Taamatuttaaq timmisartoqarfinni, aallariartortarfinni/tikittarfinni assigisaannilu angalasunik attaveqarlutik sulisut qanermut kiinnamulluunniit assiaquteqassapput. Ajornanngippat taakkununnga taarsiullugu sulisut angalasullu akornanni, plastikimik igalaaminermilluunniit assiaqusiisoqarsinnaavoq. Piumasaqaatip maleruarnissaa sulisitsisup akisussaaffigaa.

Imm. 5. Qanermut imaluunniit kiinnamut assiaquteqarnissamut piumasaqaat ilisimassutsimik annikillisimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinngilaq.

Imm. 6. Qanorluunniit immikkoortuni 1-imi 3-miluunniit allaqqasoqarluarpas, peqqutissaqarluarpas qanermut kiinnamulluunniit assiaqutit ilaannakortumik tamakkiisumilluunniit

peeqqaneqarallarsinnaapput, assersuutigalugu:

- 1) Piffissami sivikitsumi nerinermi imaluunniit imernermeri, tamanna angallammi, mittarfiup illorsuartaanni assigisaannilu inerteqqutaanngippat.
- 2) Nakorsaatitornermi.
- 3) Qarngit aalaneratigut atuaasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaappata ipianngulersitsippataluunniit.
- 5) Politiit kinaassutsimik uppernarsaaneranni.

§ 8. Kalaallit Nunaannut angalasut aqqaneq-marlunnik sinnerlugillu ukiullit nunatsinnut tikinnerminnit qanermut kiinnamulluunniit assiaquteqartassapput:

- 1) timmisartoqarfimmait, umiarsualivimmait assigisaannilu pingaarnertut najugarisaminut angalanermanni,
- 2) 2 meterit ataallugit inunnut allanut qanitsgalutik pingaarnertut najugarisaminut Covide-19-imut misissuvimmukarnerminni, aammalu
- 3) pingaarnertut najugarisami avataaniikkunik inunnulu allanut attaveqarfiusuni 2 meterit ataallugit qanitsigissagunik.

Imm. 2. Qanermut kiinnamulluunniit assiaquteqarnissamut piumasaqaat inuup Covid-19-imik tunillatsissimannngitsutut naatsorsuutigineqalernissaata tungaanut atutissaaq, § 11, imm. 4 imaluunniit 6 takukkit. Piumasaqaat taana § 13 naapertorlugu nunatsinnut angalasunut tamakkiisumik akiussuserneqarsimasunut atutininngilaq.

Imm. 3. Qanermut imaluunniit kiinnamut assiaquteqarnissamut piumasaqaat ilisimassutsimik annikillisimasunut, timikkut tarnikkulluunniit sanngiisunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atutininngilaq.

Imm. 4. Qanorluunniit immikkoortuni 1-imi 2-miluunniit allaqqasoqarluarpas, peqqutissaqarluarpas qanermut kiinnamulluunniit assiaqutit ilaannakortumik tamakkiisumilluunniit peeqqaneqarallarsinnaapput, tamatumunnga ataani allaqqasut ilanngullugit:

- 1) Piffissami sivikitsumi nerinermi imaluunniit imernermeri, tamanna angallammi, sumiiffimmi assigisaannilu inerteqqutaanngikkuni.
- 2) Nakorsaatitornermi.
- 3) Qarngit aalaneratigut atuaasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaappata ipianngulersitsippataluunniit.
- 5) Politiit kinaassutsimik uppernarsaaneranni.

§ 9. Qanermut assiaqutitut taaneqartut tassaapput qanermut qinngamullu assiaqutit ataasiartakkat imaluunniit annoraaminermit sanaat allunaasamillu tasisartumilluunniit siutinut ikkuttartut imaluunniit niaqqup tunuatungaani qilertartoq kiinnamullu attumasoq.

Imm. 2. Kiinnamut assiaqutitut tassaapput isinut, qanermut qinngamullu assiaqutit plastikimik sanaat kiinnamut attuumanngitsut.

§ 10. Angalasut timmisartukkut Kalaallit Nunaannut tikittut Covid-19-imik tunillanneqarsimannginnertik uppernarsaqaarnagu aaqqissuussanut, nalliuottorsiorernut, sammisaqartitsinernut assigisaanulluunniit peqataaqqaanngillat. Matumani illup iluani, silami, pisortat inuillu katerittarnerat, aaqqissuussinerit pisussallu il.il. ilaatinneqarput.

Imm. 2. Tamakkiisumik akiuussuserneqarsimasut akiuussutissamik kapitissimanerminnut uppernarsaasinnaasut Covid-19-imillu napparsimanermut ersiuteqanngitsut napparsimanngitsutut isagineqassapput, taamaattoq § 14 takuuk.

Imm. 3. Imm. 1-imi inerteqqut pisortat suliffeqarfiutaanni assigisaanilu isersimanermut, inuussutissarsiortut inigisaanni tamanut ammasuni isersimanermut aamma pisortat namminersortullu utoqqarnik paaqqinnittarfinut nappsimavinnulluunniit isersimanermut inerteqqut aamma atuutsinneqassaaq. Taamaattorli qanermut kiinnamulluunniit assiaqutit atorlugit Covid-19-imut misissortinnissaq, ulluinnarni nioqqtissanik pisiniarnissaq allallu pisariaqvissut allanit isumagineqarsinnaanngitsut isumaginissaat akuerineqarput.

Imm. 4. Peqataasut taamaallaat inoqutigiuppata imm. 1 inissiamut atuutissanngilaq.

Imm. 5. Immikkoortut 1 aamma 3 katersunnernut politikkut allatulluunniit isummersornissamik siunertalinnut atuutinngillat.

§ 11. Nunatsinnut angalasut Kalaallit Nunaannut tikereernerup kingorna ullut tallimassaanni kingusinnerusukkulluunniit Covid-19-imut misissortissinnaapput, taamaattorli imm. 2 aamma 3 takukkit.

Imm. 2. Nunatsinnut angalasut Covid-19-imut akiuussutissamik tamakkiisumik kapitissimasut, § 13 takuuk, Kalaallit Nunaannut tikinnermi kingorna misissortissangillat. Taamaakkaluartoq angalasoq aperineqaruni akiuussutissamik kapitissimanini uppernarsassavaa. Angalasup akiuussutissamik kapitissimanini uppernarsarsinnaanngikkuniuk, angalasup inunnut akiuussutissamik kapitissimanngitsunut malittarisassat maleruassavai.

Imm. 3. Meeqqat marluk inorlugit ukiullit Covid-19-imut misissortissangillat. Meeqqat marlunnik ukiulinniit qummut akiuussuserneqarsimanngitsut Covid-19-imut misissortissapput, aamma angajoqqaanik Covid-19-imut naammassillugu akiuussuseqarsimasunik angalaqateqaraluarunilluunniit.

Imm. 4. Imm. 1-imi misissortinnej pineqartoq nappaateqannginnermik uppernarsaappat inuk pineqartoq Covid-19-imik tunillanneqarsimanngitsutut isagineqassaaq.

Imm. 5. Misissuinermi nappaammiq nassaartoqarpat Nunatta Nakorsaaneqarfiata Peqqinnissaqarfiullu innersuussutaat malinneqassapput.

Imm. 6. Inuk imm. 1 naapertorlugu Covid-19-imut misissortinniggikuni imaluunniit imm. 2 naapertorlugu akiuussutissamik tamakkiisumik kapitissimanngikkuni § 10-mi inerteqqut Kalaallit Nunaannut tikinnermiit ulluni 14-ini atuutissaq. Inuk Kalaallit Nunaannut tikinnerminit ullut 14-it sinnerlugit Covid-19-imik nappaateqarnermut ersiuteqarsimanngikkuni Covid-19-imik tunillanneqarsimanngitsutut naatsorsuutigineqassaaq.

Tikiffissat ilaannut angalanermi mianerisassat

§ 12. Kalaallit Nunaannukarlutik angalasut Covid-19-imik tunillatsissimannginnermut uppernarsaqaartigatik illoqarfinnut, nunaqarfinnut imaluunniit ukioq naallugu najugaqarfinnut allanut

ataani allassimasunut angalaqqusaanngillat:

1) Avannaata Kommuniani:

a) Ilulissat.

2) Kommune Qeqertalimmi:

a) Aasiaat.

b) Qasigiannguit.

c) Qeqertarsuaq.

3) Qeqqata Kommuniani:

a) Kangerlussuaq.

b) Maniitsoq.

c) Sisimiut.

4) Kommuneqarfik Sermersuumi:

a) Nuuk.

b) Paamiut.

c) Tasiilaq

d) Ittoqqortoormiit.

e) Nerlerit Inaat

5) Kommune Kujallermi:

a) Narsaq.

b) Narsarsuaq.

c) Qaqertoq.

Imm. 2. Nunatsinnut angalasut imm. 1-impi pineqartut Kalaallit Nunaannut tikereernerup kingorna ulla tallimassaanni kingusinnerusukkulluunniit Covid-19-imut misissortissinnaapput, taamaattorli imm. 3 aamma 4 takukkit.

Imm. 3. Tikittut imm. 1-imut ilaatinneqartut aamma § 13, imm. 2 naapertorlugu naammassillutik akiuussuserneqarsimasut Kalaallit Nunaannut tikereernerup kingorna misissortissanngillat, taamaattoq takuuq § 14. Taamaakkaluartoq tikittut angalanermanni imm. 1-impi taaneqartut saniatigut illoqarfinnut, nunaqarfinnut ukiorluunniit naallugu najugaqarfinnut angalaqqittussat akiuussuserneqarsimanerminnut killiffimmik uppernarsaassapput. Nunatsinnut angalasup akiuussutissamik kapitissimanini uppernarsarsinnaanngikkuniuk, nunatsinnut angalasup inunnut akiuussutissamik kapitissimanngitsunut malittarisassat maleruassavai, imm. 7 takuuq.

Imm. 4. Meeqqat marluk inorlugit ukiullit misissorneqassanngillat.

Imm. 5. Imm. 2 naapertorlugu misissortinneq nappaateqannginnermik takutitsippat inuk Covid-19-imik tunillatsissimanngitsutut isigineqassaaq tamatumalu kingorna angalaqqissinnaassalluni.

Imm. 6. Misissuinermi nappaammik nassaartoqarpat Nunatta Nakorsaaneqarfia Peqqinnissaqarfiullu innersuussutaat malinneqassapput.

Imm. 7. Nunatsinnut angalasoq imm. 2 imaluunniit 4 naapertorlugu Covid-19-imut misissortinngikkuni imaluunniit imm. 3 naapertorlugu akiuussutissamik tamakkiisumik kapitissimanngikkuni angalaqqissanngilaq, pineqartoq illoqarfinni nunaqarfinnilu imm. 1-impi taaneqartuni ulluni 14-ini uninngareerluni Covid-19-imillu tunillatsissimanermik ersiuteqanngikkuni angalaqqilersinnaavoq.

Imm. 8. Nunatta Nakorsaaneqarfia imm. 1-imit immikkut akuersissuteqarsinnaavoq.

§ 13. Nunatsinnut angalasut § 10-mi aamma § 12, imm. 1-imik ilaasut tamakkiisumik akiuussuserneqarsimanerminnik upternarsaateqarsinnaagunik Covid-19-imik tunillatsissimannnginnerminnik upternarsaasinnaapput.

Imm. 2. Inuk Covid-19-imut tamakkiisumik akiuussuserneqarsimasutut isigineqassaaq inuup akiuussuserneqarsimanerup ingerlargina naammassisimaneranik upternarsaasinnaappat. Nunatta Nakorsaneqarfiata akiuussuserneqarsimanermut upternarsaatit sorliit akuerisaanersut aalajangissavai.

Pingaartumik inunnut Covid-19-imik siusinnerusukkut tunillatsinnikunut

§ 14. Nunatsinnut angalasut siusinnerusukkut Covid-19-imik tunillatsinnikuusimasut tikinnerminnilu PCR atorlugu misissortereernermikkut Covid-19-imik tunillatsissimamanerminnilu minnerpaamik ulluni 14-ini annerpaamik sapaatit akunnerini 12-inik pisoqaassusilinnik upternarsaasinnaasut, inatsisitigut naammassillutik akiuussuserneqareersimasutut isigineqassapput.

Imm. 2. Inunnut siusinnerusukkut Covid-19-imik tunillatsinnikuusimasunut tikinnerminnilu PCR atorlugu misissortereernermikkut Covid-19-imik tunillatsissimamanerminnilu minnerpaamik ulluni 14-ini annerpaamik sapaatit akunnerini 12-inik pisoqaassusilinnik upternarsaasinnaasunut, Covid-19-imik nappaateqannginnermut upternarsaanermik piumasaqaat atuutinngilaq.

Imm. 3. Uppernarsaat suna upternarsaatitut akuerisatut atorneqassanersoq Nunatta Nakorsaneqarfiata aalajangersinnaavaa.

Inuit pillugit paasissutissanik suliarinninnerit

§ 15. Nalunaarut una naapertorlugu inuup akiuussuserneqarsimaneranut inissisimaffia upternarsarniarlugu inuit pillugit paasissutissanik suliarinnittooqarsinnaavoq.

Iliuuseqarnerit

§ 16. § 3, imm. 1, § 4, § 6, imm. 1, § 7, imm. 1, 3 aamma 4, § 8, imm. 1 aamma 2, § 10, imm. 1 aamma 3 aamma § 12, imm. 1 aamma 7-imik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffigt il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imik malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsinermut atorunnaarsitsinermullu aalajangersakkat

§ 17. Nalunaarut ullormi 25. august 2021 atuutilissaaq.

Imm. 2. Nalunaarut malillugu killilfersuinerit, inerteqquteqarnerit, peqqusinerit il.il. 31. oktober 2021 ilanngullugu atuutissapput.

Kirsten Fencker
Peqqinnissamut Naalakkersuisoq

/ Aka Olesen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut